

Wajah baharu lif PPR/PA lebih ceria

KUALA LUMPUR - Dewan Bandaraya Kuala Lumpur (DBKL) memasang pelekat berwarna-warni pada pintu lif di Projek Perumahan Rakyat (PPR) dan Perumahan Awam (PA) di sekitar ibu kota sebagai salah program Inisiatif Wilayah Peduli.

Pengarah Jabatan Pembangunan Komuniti dan Kesejahteraan Bandar DBKL, Anwar Mohd. Zin berkata, inisiatif itu merupakan satu usaha untuk mendidik komuniti di PPR dan PA agar menjadi lebih bertanggungjawab.

“Mural yang dipasang pada pintu dan dinding lif mempunyai mesej yang mendidik agar komuniti menjadi lebih bertanggung-jawab terhadap kemudahan yang telah disediakan.

“Selain itu, secara tidak langsung ia dapat meningkatkan keceriaan di PPR dan PA dalam usaha untuk meningkatkan jati diri komuniti tersebut,” katanya kepada *Wilayahku* baru-baru ini.

Kata Anwar lagi, inisiatif itu juga merupakan salah satu usaha bagi mencegah vandalisme yang sering berlaku di kawasan perumahan tersebut.

“Dengan inisiatif ini, ia secara tidak langsung dapat mengawal kemudahan yang ada daripada dirosakkan golongan yang tidak bertanggung-jawab dan menyemai sikap positif dalam kalangan komuniti di situ melalui mesej-mesej positif.

“Ia juga turut dapat meningkatkan motivasi dalam kalangan komuniti untuk mempunyai sifat ‘sense of belonging’ terhadap kemudahan yang ada,” katanya.



**LIF-LIF DI PPR/PA YANG
TELAH DIBERIKAN
WAJAH BAHARU UNTUK
TAMPAK LEBIH CERIA**

**SAYANGI HARTA AWAM
JAUHI SIKAP VANDALISME**



#klkitapunya #sayangikualalumpur #welovekualalumpur #klwbc2020
Sumber: Jabatan Pembangunan Komuniti dan Kesejahteraan Bandar DBKL

LIF di PPR/PA diberikan wajah baharu agar kelihatan lebih ceria. Foto Facebook DBKL